

第〇六四册

方輿彙編

職方典

順天府部

(卷)
二一三

古今圖書集成

中華書局影印

古今圖書集成

欽定古今圖書集成方輿彙編職方典

第十一卷目錄

順天府部彙考四

順天府山川考二

職方典第十一卷

順天府部彙考四

順天府山川考二 通志府縣志合

涿州

獨鹿山 在涿州西十五里有鹿鳴澤漢武

帝出蕭關歷鹿鳴澤卽此

龍安山 在涿州西北五十里時起雲霧成龍

形

鐵柱山 在涿州西三百五十里相傳禹治水

始於冀以鐵柱維舟恐亦俗傳之說也

石虎山 按府志州城西五十里有二石狀如

虎

安樂窩 按府志州北十二里邵康節先生居

此按康節在河南此或後

涿水 發源上谷涿鹿山流至涿州入挾河

范水 在涿州西南魏置范陽郡以此

洗馬潭 在涿州城西俗傳張桓侯洗馬處

月池 在涿州西南十五里廣三頃圓如月

岐溝 在涿州西南四十里宋置關以禦金者

督亢陂 在涿州東南十五里沃美之名聞天

下燕太子丹乃遣荆軻進秦王圖也地經安史

亂後石晉割置四百餘年至明初入編戶然而

聚粟之民粒食東南之粒飽九邊士亦

能荒三輔土今過問上谷四五百里間水流時

斷林烟時見禾黍時有鳥觀所稱沃美者哉或

曰督亢陷幽州南界也以要致重不以沃美風

俗通曰沆濟也言乎淫淫漭漭無涯際也沆澤

之無水斥鹵之謂耳陂有故亭址高丈周七十

步土人稱之曰督亢亭時掘得瓦礫金錢也亭

址南去二百里古故安縣今之易州荆軻督

亢圖爲將刺秦太子丹餞送軻易水上軻爲歌

易水寒之歌後人乃迷其饒處計所從渡當燕

中都西人函關道也今指安州城北曰易水不

知今官道爲卽丹祖道與否酈道元水經注一

曰逕孔山鍾乳穴東歷荆陘者是一曰在武陽

者是也蓋酈之注易水往往馮弔太子丹云易

水出西山寬谷中東歷燕之長城又東徑漸離

城太子丹館漸離處又東出范陽合濡水徑樊

於期館西是其授首荆軻處又東南流徑荆軻

館北丹納田生言尊軻上卿館之於此

拒馬河 按府志州北郭外源自紫荆歷鐵鎖

崖東注三角淀

湖梁河 按府志舊名胡良州北十里源出房

山經州東北入琉璃河

清泉 按府志在州盤坡至桑葉澗入拒馬河

渾河 按府志州東三十里桑乾下流

乾池 按府志州西十五里一名百尺乾

南涉溝 北涉溝 按府志曰涇水東流入桃

花潭

房山縣

大房山 在房山縣西十五里雄峻秀古爲幽

燕與室故曰房下有聖水泉有龍巖峪

石經山 在房山縣西南四十里有山好著白

雲腰其半麓曰白帶山所生志題草他山實無

曰志題山藏石經者十年矣始曰石經山至今

也亦曰小西天云北齊南嶽慧思大師慮東土

藏教有毀滅時發願刻石藏闕封巖壑中以度

人劫坐下靜琬法師承師付囑自隋大業迄唐

貞觀大涅槃經成其夜山爲三吼爲生香樹三

十餘六月水漲爲浮大木千統至山下構雲居

寺焉唐元宗第八妹金仙公主修之洪武二十

六年又修之正統九年又修之山上雷音洞高

丈有餘縱橫於高有倍四壁刻經四柱刻像石

臺几案瓶罇皆石有欄橫與堂互堂左洞二右

洞三堂下洞二皆經唐迄元代有續刻經目刻

石幢人傳洞之初穿火龍也今石壁凹凸處猶

燒痕矣洞中燠而北瀟池之井之洞北有泉竇

石逕石下山始潤於土木根石而泉泉藤腹乎

木亦資泉自古暮泉上徑泉之南旋旋登登山

五頂號曰五臺金仙公主各作白石小塔以峰

之東臺壁上掌印四號曰文殊印別峰冠石後

廣前銳出於虛空號曰曝經臺山下左右東峪

寺西峪寺後香樹林香樹生處也夢堂庵唐夢

堂師居處也林後琬公塔也萬曆壬辰達觀和

尚觀像設衰頽石版殘蝕拊幢號痛率僧艾除

是夜爲來風雷光照巖壑翌日啓洞拜經石石

下有穴藏石函一尺上刻大隋大業十二年歲

次丙子四月丁卯朔八日甲子於此函內安置

佛舍利三粒願住未劫三十一字發跡際異香

發於函蓋石銀金函三發而得小金瓶舍利現

矣狀黍米色紫紅師悲戀禮贊聞於慈聖太后

迎入供養函瓶以玉外函複之安置故處僧愁

山撰雷音窟舍利記刻之石按法苑珠林白色

骨舍利黑色髮舍利赤色肉舍利紅三粒者其

肉色也山古碑多於林木其著者隋仁壽元年
王臣碑碑仁壽元年王邵碑唐開元十年梁高
望碑開元十五年王大說碑元和四年劉濟碑
景雲二年寧恩道碑太極元年王利貞碑遼清
寧四年趙遵仁碑天慶八年沙門志才碑元至
正元年賈志道碑至元二年釋法微碑山半有
庵曰半山庵庵上半里路跡宛於石號曰果老
驢跡或碑實之

三峰山 在房山縣西北二十里三峰矗疊高
插雲天

黃山 在房山縣西南三十里爲桃葉口要害

樂峪山 在房山縣西十五里

龍華山 在房山縣北五十里

霧山 詳古蹟采漢臺

一堵山 在房山縣西南四十里石壁巉峭高
三百餘尋長百餘步儼若版築

上方山 在房山縣西南八十里景物略曰上
方山晚得名一二百年內有來遊者循孤山口

而西峰橫澗東澗上測徑如古牆邊趾人如行

街中村落林烟水田麥畦時有問樞叟壯農

僮婦樵牧豎子見人無不喜畏遠望之十二
三里至下接待庵兩壁巉巖中隱一罅可伏地

徑耳不自意客步過身也三步則旋四五步則

折仰天青蒼日一九白跳而東西至此坐愁嘆
或悔焉望一平可歇息處喜矣曰歡喜臺也奇

峰環臺臺環視之有敵樓似者睥睨欄楯具有
蓮花似者青巖而黃其狀歎然行二里過兜率
門一里得石級以升級三百升九衆毘盧頂也
別一國土矣遠風平曠泉流惟緩計里方五十
庵寺百二十入巖嵌石出壑闕空者最葉師殿
也華嚴龕也珠于橋也行半里上方寺矣寺不
知當山外何方但覺上又上方是上方寺左起
一峰百數十丈石質潤滑黃間五采色上有冠
若柱若人當墜矣未墜也峰下泉曰一斗泉相
傳注泉熟腥便伏懺謝復蟠蟠峰之著者曰大

摘星小摘星望海數碑皆明碑山自古寺自今
顯晦亦以時哉

寶金山 在房山縣西南四十里峰巒紫翠其
山上有古刹

白雲山 在房山縣西南八十里山半白雲繚
繞四時常見

般洲山 在房山縣西南五十里上有二寨石
室環列居人每避兵於此

滴水巖 在房山縣景物略曰過仰山村捨澗
行碎石中石沒故道履刺其面芒鞋割其耳蹄

翻石濺如雪火星星春礮聲應四谷上黃牛岡
口路益峻又滑也周望無路折而忽通者十八

疊移步又折或數里折望烟一線有朱垣如有
紺屋如山上益力路折不通矣壑其前直下視

漆漆無所見度人以棧人無敢棧度者有洞而
僧有殿而佛休休止止又棧度之則巖也巖額

覆爭上讓下日月不流天光側入者巖中空也
其深廣三丈如斧之而成石更無隙水滲滲生

石面既乳乃垂既珠乃移既就乃滴上百千點
下百千聲亂不成聽身巖滴中視滴透瑩如失

串珠如側下冰簾巖旁石洞深三十餘丈燃炬
入北一石壁如覆半敦鑄錯亦滴聲西一石坳

水清且甘石牀中央龍年年見牀上西北一垂
石下有竇人蜿蜒入級級下行石巧出於泉泉

巧貫於石人蹣蹣躡石闕狹其步時見其光如
星再入石隙一潭幽不可以測龍所蟄也僧云
山中二白猿高俱五尺有時來坐巖下聽泉

華嚴洞 詳房山縣穀積山

雲水洞 在房山西南景物略曰登大小摘星嶺西望胡良拒馬大小河如練如帶如游絲在拄杖下顛則落河中耳而隔山不知其幾十里望且行緣嶺四五升降達雲水洞口買炬種火脫帽梳結履襪薄飲且飯倩土人導秉炬帚杖隊而進洞洞門高丈入數十丈乃暗乃炬乃卑乃偃行又數十丈鹿豕行手足摩地肩背摩石又鼈行肘膝著地背腹著石又蜥蜴行背膺著石鼻領著泥以爪勾而趾躡之乃卑漸高矣則苦煤從前入者炬灰也觸焰飛而蹣觸手懸不脫導者帶除之後者袖左右麾以入漸見垂鍾乳入漸高雖高然曲盤且仄罅也則前炬張如磬後屈曲又蟻行蟻行焉入又漸張垂乳甚衆冰質雪膚目不接土石色心忪忪瘁瘁謂過一天地入一天地矣左壁聞響如人間水聲炬之水也聲落潭底不知其歸又入有黃龍白龍盤水畔爪怒張導者曰乳石也焯炬其上杖之而石聲乃前楊炬望鐘樓鼓樓欄棟簷脊然各取石左右擊各得鐘聲鼓聲磬聲木魚聲聲審已導者曰塔共禦石而指塔塔層層大三圍其半折導者曰雪山也果一山粉如光霏霏者芒如磴益側不屬石益滑乃又臂引援行又入而左有天光透入定想之洞口外晝光也光所及壁上有字可行可數若梯可致尚可辨識左側高廣有光亂亂乃衆泉滲分受炬光泉深莫測而穴復渾小從前入者亦無更進此凜然議且出

凡洞行得一爽叢而息得一遺炬履而壯得一形似外人造者物而嘉嘆得一光知猶天也而心安然凡入洞三易炬出殺炬三一凡入洞伏仆从援七易其行由殺行十一出洞矣趨接待庵中道一石小兒足跡僧曰善財也時見白龍出輒化爲魚土人云又聞樂作

石經洞 詳房山石經山下

雷音洞 詳石經

孔水洞 在房山大房山東北懸崖千尺石竇如門源泉湧出深不可測時有白龍出遊往往樵牧聞絃竹聲昔有人乘桴窮源行五六日無所抵但見仙鼠晝飛鱗鱗游泳而已開元間早以金龍白壁禱之輒應金泰和中見桃花浮出其瓣徑寸疑爲世外仙境云

三學洞 詳房山縣大房山

龍巖峪 在房山縣大房山

賈島峪 在房山縣西爲閻仙居處

白雲峪 在房山縣西南五十里山高絕頂有雲氣

茶樓頂山 按府志縣西二十里

六聘山 按府志縣西三十里按縣志或又謂之綠屏山云

紅螺嶺 按府志縣西南四十里即幽嵐山通

體一樹犯雲霧而上非人徑也明成化時樵始徑之嘉靖僧始宇之萬曆時人始遊之

白雲峒 按府志縣西南五十里山峻絕其頂常有雲氣旋繞

三角山 按縣志在縣西三百里山峰有三角故名

蛾眉峪 按府志縣西一十五里

三盆山 按縣志在縣西

歡峪山 按縣志在縣西南七十里中有一峪寬平可居

平峪山 按縣志在縣西二百里峪中平坦山水環遶石田百畝餘

留臺尖山 按縣志在縣西三里上有三官廟碧霞宮及千孫娘娘等殿三月二十八日有會場

塔兒山 按縣志在縣西十里

鳳凰山 按縣志在縣西十里

黃龍山 按縣志

五指山 按縣志在縣西南六十里有五峰

羊耳峪 按縣志在縣西北十二里即古紅羊峪

龍舍峪 按縣志在縣西北二十里其下有伏龍穴穴有清和觀

長溝峪 按縣志在縣西二十里

寨峪 按縣志在縣西南二十里

牛口峪 按縣志在縣西南八里

龍泉峪 按縣志

中和峪 按縣志在縣北十八里山半崑間有古寺一座中腰湧泉流至寺中內砌二池蓄水利用池水流山下取之不竭

六角峪 按縣志在縣西北十里

羊頭岡 按縣志在縣北六里狀如羊首

連三岡 按縣志在縣北十五里

歇息岡 按縣志在縣西北八里

抱羊岡 按縣志在縣北三里

大石峒 按縣志在縣西南四十里黃龍山下

前產青白石後產白玉石小者數丈大者數十丈

白玉塘 按縣志近石峒山下有塘塘下隙突

出一泉其水甚清溢出浸灌稻田稻米色如玉

味美時人呼為玉塘米與西湖無錫米並珍之

王禪洞 按縣志在縣北二十里雲濛山下世

傳王禪修行之所

張良洞 按縣志在縣西北七十里

孫贖洞 按縣志

龍泉河 源發房山縣大安山西南流與琉璃

河合

杖引泉 在房山縣西南六十里東南入胡良

河

胡良河 發源房山縣經涿州東北入琉璃河

金史作湖梁

挾河 在房山縣東南源發中浣谷流至涿州

與胡良河合

一斗泉 在房山縣上方山東北山坳間俗呼

為斗笠泉華嚴祖師開山時有龍居東嶺潭中

師逐之至北峰飛錫一擊遺水斗許遂成泉

七斗泉 在房山縣北二十五里泉大於斗凡

七處水湧尺餘下入河旁有石洞淨室

廣陽水 在房山縣北公村經良鄉東廣陽與

鹽溝水合入桑乾河

北河 按縣志在縣北一里許山泉水所積

沙河 按縣志在西郭外亦山泉下流也

東沙河 按縣志在縣東一里即北沙下梢

南沙河 按縣志與上河共一道

十度河 按縣志在縣西南曲折旋繞自十度

河至石峒店歷經十度故名即巨馬河之上流

公村河 按縣志發源自山西流至良鄉為廣

陽河

漫水河 按縣志發源自龍門峪歷經磁家務

大口頭流至羊頭岡為大石河

韓村河 按縣志在縣南二十五里莫窮其源

凉水河 按縣志在縣南三里

坨頭河 按縣志在縣東五十里

支樓河 按縣志

霸州 在州東七十里喬松修竹周匝十里

鴈頭山 按府志州城東南二十五里

臺山 按府志州東二十里實九河所經大小

中有三

莫金山 按府志州城南一十二里

霸水 在霸州南三里發源白溝經州境入拒

馬河達直沽以入海今淤

沙河 在霸州南與塘河合至入海處名為飛

魚口寰宇志曰五渠水又曰長鳴水後魏孫願

嘗捕魚於此

高橋淀 在霸州城東七十里周匝二十里棹

柁圈諸水所匯

界河 按府志州北一里宋遼分界處

拒馬河 按府志州北自蘆溝河流合界河後

徙流州南北至直沽入海因宋界遼以守故名

玉帶河 按府志州南十三里西接保定界

渾河 按府志此係州之最為害者即桑乾下

流也變遷不常明正德初在州南門外嘉靖中

徙州城北後徙固安縣北今決州之城西城南

竟成巨河矣

八字河 按州志州東七十里諸水至柳次河

經堂二淀兩分焉故名

堂二淀 按州志州東六十里

金水窪 按州志州東五十里其地界下故名

窪今變為沃壤耕種

夾河 按州志出上谷涿鹿山會胡良河至苑

家口今淤

汧河 按州志州西南十八里

新挑河 按州志州南八里許舊有古河上自

蓮花臺下達臺山縣互數十里歲久淤塞諸水

散漫為害明副使陸公坤尋故道濬之水勢以

殺民甚賴之

邊家河 按州志在州東四十里

會同河 按州志在州東十八里上接玉帶下

至蘇橋以衆流至此合而為一故名所謂苑口

秋濤即此

煎茶鋪河 按州志自頭道河由溫家口平曲

達信安

楮家河 按州志在會同河東今淤

通濟河 按州志由苑家口經柁柁園關王堂

山川壇轉折而北入雙城河蓋道流也每秋水淫潦河水泛濫舟楫直抵城下商賈輻輳民稱便焉

頭道河

二道河

三道河 按州志三河俱自會同河支分東北

折而復會達信安河

馬路隄 按州志在城東四十里田家口由棘

鍼墳至信安鎮宋楊延朗城

清河北隄 按州志在口頭村十里自保定縣

燕口口抵文安縣潘平餘互九十里金移刺益

增修明洪武癸亥知州梁伯常加築

沙城隄 按州志在孟店北一里西至臨津固

安界白廟東抵青口永清縣界信安綿互八十

里明洪武癸亥知州梁伯常築萬曆甲戌副使

錢公藻增修以障渾水

高哥莊隄 按州志自州南關抵平曲村明弘

治丙辰知州毛實築以障渾水萬曆丙戌副使

錢公藻重築增修

煎茶鋪隄 按州志自劉化營經州城北抵信

安鎮延袤百里明知州毛實增築

臨津隄 按州志自涿州東境接固安楊先務

荆堡至州之趙家務臨津經州南關抵苑家口綿互百餘里明弘治戊午知州劉珩築

趙哥莊隄 按州志在城東三十里自園里村

抵菜園村勢如伏龍明知州劉珩築

萬家隄 按州志在城南二里許

橫隄 按州志城東十八里南抵苑家口北抵

柁柁園西來諸水至此壅阻斂入會同河口狹

流急卒難速洩以致上原泛漲三郡爲災明副

使顧公襄議盡決此隄以殺水勢使一瀉而下

由臺山而注信安大爲得策豪有力者阻之議

遂止至

皇清順治甲午河水橫決長隄俱頽一望數百里皆

成巨浸後雖發帑修築然捍蔽者不過城之東

北而城西城南舟楫往來迄今日甚遂以桑田

爲滄海矣顧公前議誠爲遠見

漁廠隄 按州志在城東十五里

花達墓隄 按州志上接臺山下經趙哥莊楊

哥莊田家口菜園高橋以至信安鎮綿延四十

里明萬曆甲戌副使錢公藻創築

南隄 按州志自堡家莊起由老隄村蓮花池

以至邢家務口長三十五里明副使錢藻重修

白墳隄 按州志南自煎茶鋪北抵白墳萬曆

甲戌副使錢藻築

長屯漕河隄 按州志在州南一百二十里長

三里口岸六處一馮家口一盧家口一南程家

口一北程家口一南蘇家口一北蘇家口

芥子淀堰

柳林淀堰 按州志以上二堰俱南至二道河北至頭道河

文安縣 無山

文安潭 在文安縣北十五里

柳河 按府志縣東北

黃龍港 按府志縣南

火燒淀 按府志縣東二十五里聚石溝河柳

河急河三水入衛河

白龍淀 按府志縣北

大城縣 無山

黃汭河 在大城縣東北八十里源自交河分

流至縣界入三角淀

沿河 按府志漳沱支流按縣志係漳沱支流

自獻縣河間縣之龍華橋轉入縣之南境由馬

村關村東北經十里灣自南而東又經白羊渡

四呈口匯黑龍港河從而北折繞縣東十二里

趙扶村北自子牙村分派一流三岔口一流王

家口達靜海縣三家淀入於海

交河 按府志縣東二十五里按縣志因沿河

黑龍港交流故名

黑龍港河 按縣志係漳沱河支流一自縣西

南遠南頭村入境迤邐至四呈口與沿河會一

自縣南曹家寺北流至四呈口會流一自清縣

扈家店流至王鎮達村至四呈口會流

沿河隄 按縣志起河間府接本縣舊門村至

本縣三岔口按文安縣境繕來營盤曲百餘里

黃岔口 按縣志係白溝河下流在縣東北八

十里北流至丁字沽入海

麻津淀 按縣志在縣北四十里

古隄 按縣志自本境迷隄村接文安縣境低昂斷續五十里或云長城隄或云護城隄查疑是趙武靈王所修非秦之長城也

李字淀 按縣志在縣北五十里

三家淀 按縣志在縣東北五十里係文安靜海本邑之交文大之水從茲北下

黃林口 按縣志在縣南十里爲河大兩邑要害萬曆年重修

皇清康熙十年邑侯張關同河間各修縣界隄一

本境沿河護田隄岸一 按縣志馬村口至三岔口共一萬三千四百三十丈

協修隄岸七 按縣志霸州長屯南蘇家口一百一十丈

北蘇家口一百三十四丈

程家口五十五丈

文安縣籍來營隄六十丈

武哥莊隄三百一十三丈

保定縣靳家背後隄一百一十八丈

柏木橋注窩隄四百七十丈

保定縣

玉帶河 在保定縣北東流入會通河

潘家燕子口 按府志縣西南

馬家燕子口 按府志縣西南

河隄 按縣志邑居諸水下流西北而來者九

日蘆溝拒馬夾河琉璃胡良桑乾烏流白溝白溝西南而來者六日黑羊一畝泉方順河唐河沙河磁河北九河自新城雄縣而下匯於毛兒

灣俱經保定玉帶河達苑家口南六河自任丘而下匯於五官淀亦經保定玉帶河達苑家口一河之隘不足以容萬派之流以故橫出必先及於邑之河北中亭河寨上村桃花漫張青口燕子口小河等處再決而南田苗漂沒無餘矣末樂六年知縣王孟原始築隄防之民患稍安末樂十一年知縣楊汝誠重加增修見水溢隄決保定與文安大城暨雄之東鄉霸之南鄉均害保定民貧力寡較文大雄霸霄壤用是申准撫按每年春初雄霸文大保定五處各分工修築

霸州隄 按縣志接保定縣盧哥莊界牌東至太堡莊西頭止自太堡莊東頭起至善來營則

文大隄也

大城隄 在保定縣界內者一自北壇起至劉家園長二百八弓久不修築一自西壇起至擺渡口長三十三弓久不修一自靳家背起至姜家村長二百九十弓一自何家道口起至橫隄

全文安修築

文安隄 在保定界內者自路疇北頭起至十

王堂右不在保定界內者不著

保定隄 一自十王堂西起至盧哥莊界牌止

一自路疇南頭起至北壇止一自劉家園起至

北門止一自西關起至西壇止一自擺渡口起

至大城隄止一自大城隄西起至何家道口東

止一自文安何家道口隄南頭起至上五哥莊

止共長五千二百八十弓外有遙隄自白家道

口起至上武哥莊止共長二千八百弓大城分修八百四十弓文安分修一千四百弓保定分修五百六十弓

文隄 按時修築且堅且厚可以禦流近惟十

王堂南所決兩口新隄尚不如別隄堅厚然文

之人力可勝集築堅厚無難保定隄以人少力

絲隄長二十餘里枵腹負土之民一上隄岸動

經數月極力盡勞不遑安處然特隄爲命修築

實不可緩在當事加意而已大城隄雇工遠來恐至失時有心民瘼者宜何如振作也

霸州 在霸州東北五里舊名翁同後改此

按州志傳廣成子盧其上黃帝問道焉

螺山 在霸州南五里魏志漢陽螺山卽此

盤山 在霸州城西北二十五里山不可登盤

而登之曰盤山豐石而歎於土樹圻石鱗生者

根積極身較斗癭柯輪轉而輻引山固石層

縈之而愈出上若墮不墜下若仆未仆古逕出

其下又多奔泉觸石濺而鳴日夜與石之鏖

下而廣額者勢相搖傾所謂盤泉也泉延十里

金沙其底石所潔也魚魚影影不可匿亦不可

捉石爲之寶塞也峰危壁削風氣到地苔溼到

天千古一翠有石欲飛墜所謂懸空石也兩巖

久立相肅光潤相及者天門開也門開得逕門

容臂逕容掌巖肘其右壑虛其左大石阻絕引

索始登從來惟威將軍繼光袁吏部宏道登焉

凡登天門者至上方寺望而止西上二十里卽

盤頂也頂爲笋爲錐又立塔日過之影落塞外風過之鈴振半空雨過之雷奔趾下欲少停不可得故雲昭寺高潔而僧肅如盤有三上盤塔中盤寺下盤泉寺少林寺也寺傍紅龍池乃鑿石龍而朱之者也名得而實失踰四嶺而西李靖庵李靖舞劍臺有唐李從簡來遊數字刻焉嶺上一石如人著幘頭坐而又腰土人嘲之曰石尉遲東過十里雙峰寺有李仙脚跡訛也而記盤山者曰李愿盤谷薊之山庸豫之谷耶益訛也

桃花山 在薊州西南六十里魏志漁陽桃花山即此

甘泉山 在薊州西北七十里山頂有石狀如犬又名石葵山

沙嶺 在薊州西三十里盤山末路也高二百餘仞周六里泉水沿流奇石崇聳

鐵嶺 在薊州北十里高百餘仞石色如鐵中有懸崖

魚鼻山 按府志州城東北二十里

別山 按府志州城東南二十里凡自東而西者必由之周行

漁山 按府志州城西北三里高丈餘即古漁陽之名所由起

黃花山 按府志州城東北六十里上有玉皇殿鐵瓦無梁

燕山 按府志州城東南六十里自太行山而東延袤數千里直抵海岸

龍池河 在薊州南一名魚水發源盧鬼嶺口流合黎河經玉田縣入白龍港

金泉河 在薊州北泉自地湧流爲馬中河

黃巖川 在薊州北四十里宋置廣川郡取此盤泉 在薊州盤山中

車箱渠 在薊州西北抵昌平

沽河 按府志城南五里自蘆兒嶺以西洶河以東諸水皆入焉

沙河 按府志州城西二十五里源出盤山入於沽河

白馬泉 按州志在城西北三里許崆峒山下每夏秋有水溢出盈池相傳府君神馬飲水於此

黑馬泉 按州志在城東北三里崆峒山下

白澗 按州志在城西北四十里發源於盤山西峪經羅家峪中皆白沙而水極清淺四時如秋

白龍港 按州志在城南七十里沽河洶河皆會於此相傳有龍騰於此又以近海潮名潮河

玉田縣 徐無山 在玉田縣東北二十里漢末田疇避難於此產不灰木生火石

無終山 在玉田縣東北三十里古無終子國地搜神記曰陽雍伯葬無終即此遼白仲理隱居於此

古溪山 即麻山在玉田縣北十五里陽雍伯種玉處

玉屏山 即獨樂崖在玉田縣北二十里高聳

翠嶺山巔平廣可容萬人舊以崔名山今改此

龐山 在玉田縣西北二十五里四崖壁立嵯峨雲俗傳唐太宗駐蹕於此

文龍山 在玉田縣西北二十五里由燕山口入二里許古聚高槐綠陰青翳盛夏無暑登巔眺望湖光遠近雲樹蒼茫城郭歷落宛然如畫

楸子山 在玉田縣西北二十五里路逶迤連削壁對峙日色不到行五里許楸樹紛紛披瀾流斷續禽鳥非常別有境界又二里得寺在煙霞

中泉甘宜茗遊人至恆流連不忍去

燕山 在玉田縣西北二十五里自西山進行直抵海峰

小泉山 按府志縣東北二十五里有泉出石罅合孟家泉入白龍江

石鼓山 按府志縣西北二十里唐太宗東征高麗聚兵擊石聲如鼓

石棚山 按府志縣西北三十里泉出石竇甘涼可飲

麻山 按縣志城北十五里陽雍伯種玉之處

九峰山 按縣志縣北二十里山有九峰

大泉山 按縣志城東北二十里有泉今淤塞

東桃花峪 按縣志城西北三十里

四角山 按縣志城東北十五里

鎮虎峪 按縣志城西北三十里有鯉魚洞

白山 按縣志城西北四十里

常山 按縣志城東北三十里

中山 按縣志城東北三十里

蜂山 按縣志城西三十里

螺山 按縣志城西四十里以形得名下有泉民取灌漑

圍子山 按縣志城東四十里

石欄山 按縣志城西北三十里

白陽峪 按縣志城西北三十里

鸚兒峪 按縣志城東北二十五里

烏龍洞 按縣志城北十二里麻山西南其洞盤環深二里

天橋峪 按縣志城東北三十里

聖水盤 按縣志城西北三十里有水一區

洞山 按縣志城北二十里山巖有石洞風自洞出載祀典八景之一

飛雪泉 舊名光沙在玉田縣南溪澗中湧沙而出細白如雪攻金治玉者競取爲簪資

藍水 在玉田縣西北二十里發源三樂臺山石間其色如靛故名南流入白龍港

沙谷水 在玉田縣東北二十里徐無山與黑牛谷水東流合唐水

黑牛峪水 按縣志出徐無山東南

唐水 按縣志城東五里

孟家泉 按縣志發源小泉山下

小泉河 按縣志發源黃家山

雙城河 按縣志三泉匯集下通薊河西水一

青溝 采亭橋河

鴻橋河 按縣志三泉匯集下通薊河西水一

泛劉家橋一帶隄堰最爲緊要宜亟爲留意云

長涯河

南河

漳酒河 此三河併縣志亦不詳其源委或皆小河也

還鄉河 源出豐潤縣北崖兒口河勢上寬下

狹夏月霖雨諸山水皆匯大爲民害舊例補築隄岸係豐玉兩縣合修

皇清定鼎憫民力單弱發帑銀七萬差工部督兩縣民合修康熙四年邑令申文止帑王民獨困

平谷縣

魚子山 在平谷縣東北十里有大塚相傳爲軒轅黃帝陵亦據陳子昂詩有北登薊丘望

求古軒轅墳之句也

瑞屏山 在平谷縣北二十里秀列若屏有臺有寺

妙峰山 在平谷縣東北二十里峰巒秀聳下有九姑泉

喝山 在平谷縣東五十里峰巒峻峭林谷深幽

城山 在平谷縣東六十里高聳如城堞有石室僅容一人臥俗傳孫真人會居此

泉水山 按府志縣南八里泉流入河民賴灌田

峨眉山

靈泉山

柏山 按縣志三山俱在縣東北二十里惟峨

眉低員秀麗尤爲可愛

雞足山 按縣志在縣東北三十里下有泉寺

盤山 按縣志在縣東三十里高二千餘仞周

百餘里勢磅礴而盤桓峰巒疊嶂然排空亦

勝槩也邑名盤陰以此一名盤龍山

紅泥洞 按縣志在縣南十五里

氣鼓嶺 按縣志在縣南十五里形如鼓上有孔每旦雲氣浮出故名

洵河 在平谷縣東北源發塞外入黃巖口經漢川西流經平谷東復東南而南流經三河至寶坻入白龍港

沽水 一名西潞水又名東潞水水經云發源塞外丹花嶺合九泉水南徑安樂故城西南與

螺山水合爲西潞水又南經孤奴故城西與鮑丘水合爲東潞水

周邨河 在平谷縣西與馬莊河獨樂河小碾河鄉泰河會入於洵河

唐水 在平谷縣東南十里發源徐無山

龍泉井 在平谷縣東十里明成祖駐蹕時所鑿

逆流河 按府志即小碾河也在縣境之南源

出泉水山龍王廟二十五里按縣志發源泉水山下西北流入於洵河

龍潭 按縣志一在縣南大王務一在縣東北

龍王廟二十五里

獨樂河 按縣志在縣東北二十里或伏或見

斷續無常西流入於洵河

遵化州

鳳臺山 在遵化州西七十里脈發太行幹綜
薊野千巒擢旭萬壑堆雲出乾而入巽形家號
曰亥龍左良而右坤占者咸云像虎載翔載翥
而來真是九苞翮翮有起有伏而駐洵稱五采
翬翬惟鳳有棲斯臺

明月山 在遵化州西南十三里高百餘仞上
有石穴圓而明南北相通望之如月故名明月
山

五峰山 在遵化州東北二十五里山勢磅礴
五峰列峙東曰快目南曰瑞雲西曰紅翠北曰
虎巖中曰紫蓋上有禪林寺

葡萄山 在遵化州東南三十里土多葡萄故
名

龜鏡山 在遵化州南四十里舊名磨臺上有
蓮池金王叔云有龜負鏡出池土人異之作寺
改今名

三台山 在遵化州東北七十里盤曲三層故
名

白冶山 在遵化州南五十里上有白冶子鑄
劍處

松亭山 在遵化州東北一百二十里多古松
乳山 在遵化州東北三十里州治發脈於此
俗名媽媽山

瑤峰山 在遵化州東北二十五里其山白石
璀璨如列瓊瑤

太行山 按府志在州之北入燕則曰燕山即

長城山也

呀髻山 按府志州西北二十里高千丈下有
福利寺

靈臺山 按府志州南五十里高九百餘仞
釣臺山 按府志州南十里高百餘仞下有溪
潭可釣

金山 按府志州東二十里

夾山 按府志州西南四十里兩山相夾故名
高數百仞

南龍山 按府志州南八里北又有北龍兩山
相望蜿蜒如龍

大團亭山 按府志州東北一百一十里山之
北又有小團亭山

景忠山 按府志州東六十里舊名陰山高數
十里為境內諸山冠

鐵山 按府志州東五里有記
鼓山 按府志州南八里隆起如鼓

清風山 按府志州南十七里四時蕭颯有風
上有玉皇地藏碧霞三祠

筆架山 按府志州南二十里三峰如筆架左
與明月山連中斷處為小燕口峽峽南有仙人
搗藥石今祠藥王於上

燕山 按府志州西南七十里高千仞陡絕下
有寶十郎莊

桃花山 按府志州南二十五里上多桃樹其
巔有塔今廢

香爐山 按府志州東南四十里

茂陵山 按府志州東北四十里有寺

舍身臺山 按府志州東北二十五里高千仞
上有泉山半舊有梵刹久廢順治十二年僧普
門重修附記昔有僧師徒三人並修梵行老僧
飯數多沙苦之少者立願洵淘去期三年圓滿長
者妬之潛沙飯中師飯沙呼少者曰不期汝今
飯實有沙爭一宿未滿可惜沙彌曰一夕亦負
願遂懸崖捨身澗中如落朵雲妬者以澗中有
異亦舍身老僧尋澗中妬者死矣小者惟遺一
履因並葬澗側為二丘小丘者履耳

野狐山 按府志州西北十七里有澄潭旱
則土人乞雨於潭多應

關山 按府志州西三十里

鳳山 按府志州東北二十五里內有古剎山
形如鳳

五里河 在遵化州北五里源發沙坡峪經州
西南合枯河入白龍港

梨河 在遵化州西南源發樂陽界經州境與
湯池河合

湯泉 景物略曰湯泉在遵化州北四十里泉
從山坡下沸而四出魏王土地記曰徐無城東
有溫湯水出北山溪即溫源也萬曆五年戚大
將軍繼光甃石池之深二丈方四尋覆以堂曰
九新水東出於石為之龍吻噴其怒未至泉數
十步氣熾熾聲洶洶其不可即即之靜若鑑投
錢池中翻翻若黃蝶百折而下至底宛然錢也
以熟生物與炊者等後堂壁刻武宗宮人王氏

怨詩導而左遠之爲小塘塘陰有實以通寒水浴者時啓而刺泉之溫寒水者亦泉也去湯泉數武出於泥沙湯泉有石根若焦釜者出之石不反則寒矣泉前唐寺貞觀二年建名福泉寺人又呼湯泉寺

湧珠泉 在遵化州鐵廠北二里許一名聖水泉平麓積石泉自石罅中出湧泡如珠旱引灌田亦一方之利

蒲池 在遵化州西七里廣一里有記

清水河 按府志州西六里源出道溝峪會沙

河入水門口

沙河 按府志源自羅文沙坡等峪以達南關入水門口

水門口河

按府志州南三十里兩山之間九河之匯自懸崖而下

合河

按府志州西南七十里蒼山前一州之水會此

灤河

按州志又名灤江州東七十里源出塞外由潘口入南經灤州入海宋因名郡爲灤川

郡

臨河 按州志州西七十里

聖水庵泉

按州志在桃花山下迸於懸岩水甘冽側有芳樹石室相傳有老衲憫僧遠汲勞

苦呪而得泉

海子

按州志州西南四十里縱廣十數里爲湯黎二河下流

鹿角河

按州志州西南七十里近河池舊苦

水知縣辛志登開渠洩之遂成膏腴
雙泉 按州志州東南四十里產上水石水沫浸腐草結聚而成

茂公泉 按州志州西北十八里其水自北來從下而上至馬相營引渠汲灌村人利之又名劍泉

樓子湖 按州志州南十三里縱廣七里產蓮芡成化中澤水渚注遂成淵津

豐潤縣

鴉鵲山 在豐潤縣西北二十里有石穴二俗呼孟家洞趙家洞

陳宮山

在豐潤縣北紫迴數十里東至還鄉河西接黃土嶺其色蒼翠又名花山

書室山

在豐潤縣西北四十里舊名靈應山懸崖壁立上有泉噴流而下有巖曰攻書室改

今名相傳韓信曾閱書於此至今有石案石硯山津時滴池奇蹟也

夕月山

在豐潤縣東八十里舊名朝月兩峰特起狀如偃月改今名

石鼓山

在夕月山南狀如石鼓

腰帶山

在豐潤縣東八十里山腰有石如帶琵琶山

在豐潤縣北三里產白土如粉可壅屋壁以形名

王化山

在豐潤縣北五里孤峰疊翠寺觀清幽

車軸山

在豐潤縣南二十里圓而高若臥轂然上有無梁閣一塔二宋崇寧時建

翠花山 在豐潤縣東北二十五里石如翡翠故名

金窩山 在豐潤縣北三十里斗絕峻嶒山半一洞石屏固局上有朱書人不盡辨惟黃金無人見五字耿耿不滅故以名山

偏崖山 按府志縣大嶺山西南其山東峻西低高數百仞

馬頭山 按府志縣東北四十五里數峰馳驟一峰昂若馬首

覺峪山 按府志縣北五十里

無終山 按府志縣西北四十里乃古無終子國之處也

靈應山 按府志縣西北四十里懸崖壁立有泉噴流有巖曰攻書室

崖兒口山

按縣志縣東北八十里衆峰連互東斷爲崖兒口有水自崖而出是爲還鄉河斷

爲白霄口有民近口以居亦云白霄里

水頭山

按縣志在腰帶山西南有泉一脉出於叢石之間故名

狼山管

按縣志在鴉鵲山西北兩山對峙中有路通遵化又名兩山口俱古志

念經峪山

按縣志在縣東北上水路北其山巍峻澗谷逶迤草木叢茂多產榛棗可收百石遠近居民咸取利焉

唐山

按縣志縣東南四十里孤高秀麗灤派經東上有姜將軍廟藥王廟出煤供鑛石可煨

爲灰九宜給磁陶居民利之

石井山 按縣志縣北下水路上有一石形若龍口內容水數升不取不盈隨取不竭冬夏不殊亦云奇矣

醴泉 在豐潤縣北縣以名鎮

便水 在豐潤縣一名還鄉河發源崖兒口經縣西南過玉山鴉鴻橋入梁河至寶坻縣草頭湖入於海

韓城鎮河 按府志源自鎮北西流入漫河

官渠河 按縣志源自灤州新城西南流經縣境板橋河自東北來注之又西南流過徐家莊散入漫泊

沙流河 按縣志發源黨峪山下經流兩山口又西南流至姑嫂橋南會還鄉河入於海見古志

陡河 按縣志縣南三十里發源於遷安縣館山由牝牛橋河而來其地掘丈餘有水火炭可供鑿陶磁器者尤利之

泉水頭河 按縣志在上水潞北其泉潰出如珠流派達於板橋河經唐山官渠入於海

靈泉井 按縣志在腰帶山南百餘步有石崖如屋其下一實深尺許泉注其中

龍泉井 按縣志在陳宮山南一石鑿成水湧出每六月後即滿且溢至冬乃止焉又曰溢泉井

神惠井 在豐潤縣韓城村里許耕者得古井嘗之有藥味病者飲即愈千里外爭來飲

欽定古今圖書集成方輿彙編職方典

第十二卷目錄

順天府部彙考五

順天府山川附考一

職方典第十二卷

順天府部彙考五

順天府未詳山川附考一

山川志多未詳故博採輿籍以備參考

萬歲山 西元集云萬歲山在子城東北元武門外爲大內之鎮山高百餘丈周廻二里許林木茂密其顛有石刻御座兩松覆之山下有亭林木陰翳周多植奇果名百果園天啓宮詞注云萬歲山嘉樹鬱葱鶴鹿成羣俗稱煤山天啓甲子六月山椒有五色雲臺占曰景雲將降旨行慶賀禮以六科廊災乃寢野獲編云今京師厚載門南逼紫禁城俗所謂煤山者本萬歲山其高數十仞衆木森然相傳其下皆聚石炭以備閉城不虞之用者又官殿額名云崇禎七年九月量萬歲山自頂至山根斜量二十一丈折高一十四丈七尺嘉靖中禁中有猶徵青色惟雙眉堂潔名曰霜眉善伺上意凡有呼召或有行幸皆先意前導伺上寢寐概不移上最憐愛之後死勅葬萬歲山陰碑曰虬龍冢

秀巖 燕史云飛虹橋南北有坊二曰飛虹戴龍姜立綱所書也橋北有山山下有洞額曰秀巖以磴道分而上之其高高在上者乾運殿也左右亭各一曰凌雲御風界以小石藤蘿花卉若牆壁焉

兔兒山 天啓宮詞注兔兒山即旋磨臺天啓乙丑車駕臨幸鐘鼓司丘印執板唱洛陽橋記攢眉黛鎖不開一闕大年復如之宮人相顧以其近不祥也

瓊島 西元集瓊島在太液池中從承光殿北度梁至島有巖洞竊窺磴道紆折皆疊石爲之其巖古殿結構翔起周廻綺牖玉檻重階而上榜曰廣寒云殿相傳遼太后梳粧臺今欄檻殘壞內金刻雲物猶彌覆椽棟間下布以文石旁一榻亦前朝物殿前舊有四亭曰瀛洲方壺玉虹金露今惟遺址耳戴司成集云瓊花島在內苑之北自山麓至巖百三十餘步周二百餘丈皆疊石而成者

畫眉山 帝京景物略在西堂村之北產石黑色浮質而賦理入金宮爲眉山山北十里有溫泉出焉

白鹿巖 大江集麋山西北越橫嶺有白石如幢屹立嶺上微有字畫然薄蝕不可辨矣嶺外連峰不斷一峰最異白鹿巖也最高數十丈嵌空欲墮中虛可旋兩車巖左一隙如懸檐下視深宵不知所際相傳遼時有仙人騎白鹿往來斯巖故名登巖頂矚萬壽山如豎掌指有古槍

一株根出兩石相夾處盤旋橫繞倒挂於外大可百圍色赤如丹砂巖角有茅舍間有西僧居之黃眉紅頰采草根和水以食語音不通見人嘻笑而已不知何年至此棲遲是山也

妙高峰 帝京景物略通金山口二十里一石

山小峰屏簇如筍張簾峰之尊者曰妙高峰峰下法雲寺寺有雙泉鳴于左右寺門內磴爲方塘殿倚石石根兩泉源出焉西泉出經茶窰繞中甯東泉出經香積廚繞外垣匯于方塘所謂

香水院金章宗設八院游覽此其一院草際斷碑香水院三字尚存 珂雪齋集法雲寺在西

山後遠視惟一山近則山山相倚如笋包擲

覺山 明一統志在府西三十里懸厓之上與

盧師平坡鼎峙西有三泉曰清冷曰清甘曰清

至也 燕都遊覽志韓延壽墓在焉五華雙泉

翠峰仰山諸峰環之如屏

罕山 帝京景物略志稱韓家山漢循吏韓延

壽家焉罕韓音譌也俗呼黑山黑罕音又譌

也山黃壤一平岡耳山陽二寺曰靈福曰延壽

延壽者太監剛鐵墓前寺也鐵從長陵靖難把

百斤鐵鎗好先登陷陣鎗今存寺中鐵本名炳

長陵每呼以鐵遂名剛鐵墓無石表無翁仲惟

石墩六僧云長陵賜鐵坐凡六故六墩也一碑

無文字惟皇明司禮監太監剛炳之墓十一字

鐵後凡掌司禮者祀寺左堂韓延壽墓在山之

南碑梵皇高以丈非漢碑也志云有故碑剝落

今碑復不存

雙泉山 明一統志在府西四十里山有二泉故名東北二里許有黑龍潭

垣牆山 太平寰宇記一名萬安山在薊縣西五十里山有鐵鼎其下有舊置冶處

翠峯山 明一統志在府西五十里又名遮風嶺以山陰有嶺橫列如屏可以障風故名

桃花峪 在府西四十里介乎翠峰遮風間中多花卉其下舊開披明一統志所謂云遮風嶺相其形勢度其道里即寰宇記之垣牆山

分水嶺 在府西四十五里山澗諸水至此分而為二一入蘆溝河一入房山縣界

石徑山 燕山紀游孤峰特立洞皆鑿石而成最上為金閣寺有塔宜遠眺東南行至林衡署有古松數百株參錯平野間其地蓋先朝果園也

滴水巖 燕山紀游在萬山中出磨石口至三家邨渾河倒映崖壁峭絕皆作丹黃青碧色河流其下逕紆其上度十餘里入軍莊一峰側出而腹藏洞者為建陽洞拾河行環園越仰山嶺亂山擁塞幾不得路循山趾行夾壁中有村臨谷口為桃源村村前孤峰矗立中有洞昔人避兵處也復沿澗過仰山村山多梨樹秋深紅葉如燒折而西上黃牛岡口逕愈仄壁愈狹峰愈變轉十八疊有垣而望屋而丹是謂滴水巖矣懸崖千仞巖洞皆削成無縫泉布石面大珠小珠遊移如屋漏然旁有穴燃炬以入廣可三十餘丈洞中石乳為蓮花垂為象鼻石一石牀幕以石龍見其上中石砌開其側側身羸旋而下

水光所射幾滅炬再入則潭深莫測矣從巖側取逕而上杖履鏗然山石骨而中虛俯巖皆視巖猶谷底二十里至北頂連岡伏嶺勢仄平坦可望居庸諸塞歸從仰山寺金大定中棲隱寺也 長安可游紀三家村盡出渾河崖八里過軍莊外臨陡崖內倚絕壁兩手捫石而度抵囊園背河入山度仰嶺十八盤有村名桃源過北皆流泉峭壁遍開野菊金鈴聚花如繡組澄潭紫石了了見底左右度澗行至陳莊鳴泉出戶下兩旁高峯夾之雞犬石門真一洞壑又背泉入山路僅一綫上黃牛岡口益險隘自此而登左萬丈溪右千仞壁徑斷處架以棧過張公洞即滴水巖矣燕山紀游從滴水巖至大雲寺山最高是西山萬峯之巔也

仰山 長安客語仰山峯巒拱秀中頂如蓮花心旁有五峯曰獨秀翠微紫蓋妙高紫微中多禪刹以在西山外東西四十餘里故人跡罕到金章宗嘗遊焉有詩曰金色界中兜率景碧蓮花裏梵王宮鶴鷺清霄三更月虎嘯疎林萬壑風今石刻尚存

西連山 長安可游記下黃牛岡口取仰山道轉一岡為南莊復歷峻坂土中有三斷石讀之乃知為大興府西連山棲隱寺金大定初建有五峰八亭章宗屢游之常題詩刻石今亡矣惟二碾藥鐵輪尚存又有學士劉定之記絕頂曰蓮花峰有舍利塔右一峰為筆架峰八亭惟列宿招涼可記餘俱未雅馴

馬鞍山 長安客語馬鞍山龍涓洞兩壁石乳瀝成物狀有如繪畫旁局一石門啓門以火燭之有石如龍沙擁為洲一井絕深投以瓦礫不知所止相傳井與渾河通有人投一大井中驗之果從渾河流出

王平口大漢嶺 燕山叢錄宛平縣西百二十里王平口四圍皆山中有平原可數十畝地暖饒藥草花木春夏之間紅紫爛熳香氣郁金章宗常游所憩石牀尚存 帝京景物略府西一百二十里由王平口過大漢嶺抵沿河口元女廟百花山足也 長安可游記由門頭村登山數里至潘閣廟三里有天橋從石門進二里至孟家衝衙民皆市石炭為生三里至流水壺泉自石罅分流灌園板磴三里至官廳路凡十七折至風口巖兩山矗立如門有庵房數間徑十字道踰磴數里折而下為王平口山坳多核桃樹石壁峭削如碧玉又數里至蘆石臺路亦峻又數里至板橋村莊多以石板覆屋至千軍臺四山空翠欲濕衣裾出谷二里許為王老庵石澗淙淙有十五折見高松如蓋出天際乃大漢嶺也踰嶺有大士殿松下石碑字俱蝕不可辨盤曲而下數里至泥窩三里上楊家臺徑頗平又里許下坡入山谷有澗水浸山根石皆赤亦有碧者從亂石徑中行二里出谷為軍下村溪澗十丈餘平沙細石流水分兩村下引入地畦再北有石廟自廟涉澗則西河村也又二里為龍王廟相近有守禦城出小西門元女廟在

焉

馬關山 帝京景物略渡石澗上馬關山折旋左右至法幢庵五里可容騎又五里離徑坦然妙庵也 長安可游記出沿河守禦城西門渡石澗進馬關山曲折上坂石子磊磊難步履至法幢庵又五里至馬關村登三士閣一松高十丈餘歷磴而上三里許翠峰壁立又二里扳躋叢木中再上見離徑石坦乃妙庵也中設大士像

千佛山 觀音山 鶴子山 帝京景物略嶺西行數里千佛山又數里觀音山山舊有菩提樹仙人橋望海石下嶺復上嶺者數迎前壁立者鶴子山 長安可游記自妙菴從嶺西折路甚狹數里上千佛山一名黑風山又數里爲觀音山再上爲大悲崖旁有仙人橋菩提樹已遭伐矣又上爲望海石欽峯巉削踰嶺凡七見有石壁峭立爲鶴子山路更險仄達千佛巖怪石攢簇多似人形坐視觀音山如在懷抱間

百花山 帝京景物略度闕王鼻行百花中一里進籬門石洞禮文殊法身塔登菩薩頂是百花山頂 燕山叢錄宛平縣西二百里里有百花山特多花卉有不可名者薊中不產蛇獨此山七寸蛇至毒被蝨者不救 長安可游記鶴子山三里餘過闕王鼻始躡百花山腰西北兩山秀甚云東西二靈山也西北爲小五臺山花多目所未覩紅黃紫翠不可名狀一色者跗萼各殊有名天花者九嬌豔可愛行里許忽聞鐘聲

前進入籬門過石洞殿上設文殊金像高一丈三尺有塔云是法身塔上菩薩頂峰三以小石更累成尖風吹不去有登者老僧必勸累之云種佛因 帝京景物略下菩薩頂又入百花中東龍王頽廟北大士殿下千佛巖花被逕八里多於前過白水庵行泉聲二里一松標瑞雲寺寺即五代時李克用建亭故處俗曰百花寺也寺有摩訶祖師法身有摩訶堯石鑄宣宗會取視賜以龍猊歸寺有摩訶捍龍石龍逸祖師追捍之今龍迹宛在石也

菩薩巖 長安可游記下坡之半山花較初登爲多折而西爲龍王廟廟已圯惟殿僅存五龍王分列中供龍母北折爲大士殿下取道瑞雲寺約八里至白水庵山名菩薩巖又行里許有巨石當路界于澗中遠見一松映對即瑞雲寺也俗呼百家寺入禮摩訶祖師山僧出摩訶銅相示黑澗如古銅鑄僧言曾三入大內供養出寺度小橋下菩薩崖二里爲曹村又數里至史家營堯沙人皆聚於此 明一統志菩薩崖在府西北一百二十里山畔有三石佛像

史家營太山 燕山叢錄宛平縣史家營太山有石如臼相傳昔有仙人居此臼中每日產米隨寺衆多少取給不乏後有僧厭其險峻鑿石穴通之穴成而米絕

燕山石塘 長安可游記從史家營緣石澗而上甚危險巨石巉峻仰視欲墜云即燕山石塘以山頂泉出其下故名踰二大嶺路始平廣又

數里爲山神廟上數武即妙庵也

黑雲山 燕山叢錄宛平西黑雲山有兩穴扣之聲若鼓掩其一則無聲

并頭山 太平寰宇記薊縣并頭山有溫泉治百病

西湖山 明一統志西湖山在府西一百里有溪潭

青山嶺 在府西一百五十里山四面高聳中坦平多產三七諸藥

百望山 長安客話百望山南阻西湖北逼燕平背而去者百里猶見其峰故曰百望

駐蹕山 薊丘集百望山之陽有祠焉高十五丈登之可望京師出百望十里爲長樂河河水不甚闊而流駛又北二里爲玉斗潭中皆腐草

菴之深不可測傳有兩牛飲而鬪陷于潭無迹又北十里爲瀧石駐蹕山在焉

雅思山 長安客話京西北諸山連綴共一百八十里半隸昌平其隸宛平境內與昌平錯壤者出百望山北四十里入南谷有聚焉是名漆園園之南有雅思山幽晦多霧山陷而爲坎有池曰露池

鰲魚嶺 薊丘集自漆園出而西十里許有高崖崖下有泉遠之又西北十里爲清水澗兩山如門行可二十里山皆奇峭巉巖飛泉澎湃決

地分流聲激崖穴厓間百合忍冬棠杜牛姪相思郁莫黃精唐求之屬紅翠含濡鳥窠雉囫山鹿之羈家豬之毛徧于巖谷有嶺曰鰲魚又西

里許山益峻有蘭若二上曰松陽下曰金鷹金鷹下控大巖巖吐百穴匯而爲湖決而東流是匹清水之源

十八盤山 長安客話出百里西北六十里有徑曰十八盤山有湯泉云是遂后浴處西一舍碧鴛鴦揚高峙南北有湖焉小而深在碧鴛之巖圍結不見每春夏之交山水增流則湖益清可鑒曰合抱河

臥龍岡 明一統志臥龍岡在府西北四十五里山石俱青惟此獨白岡脊蜿蜒二十餘丈正統間車駕嘗幸此

石窟崖 在府西北一百一十里

白鐵山 在府西北一百八十里山多白石其堅如鐵

顏老山 在府西北一百九十里山之西南有石青洞東北有柳林水

小龍口山 在府西北一百九十里山有兩崖東崖在清白口社西崖在清水社有泉東入盧溝河

柏山 在府西北清白口社山四旁多產柏故名上有柏山寺

半天雲嶺 山行雜紀烏龍潭度高嶺即臥佛寺嶺名半天雲圓如髻度一嶺一髻復起如是者十三始登其巔四面皆童山雖無草木而石

最可觀鐘鼎旗鼓墩柱樓閣龍虎之形畢具有石大如室中一綫若鋸分者而內有石釘復連不斷又有石軟側嶺上欲墜中一穴可容身入

內空虛五六尺可跌坐上復有二竅甚明朗又有方石三四丈黑色紫紋如梅花瓣瓣中有細竅取澗水灌之四面溢出如珠蓋諸竅宛轉相通天下奇石無踰此矣下嶺三里許復值一嶺如磨盤每盤直下三百步凡五十四盤至山腰嶺盡得石坡路甚滑又七八里爲廣泉寺

君子口 澁水亭雜識西山有君子口疑卽寰宇記所云君子城爲箕子城者也

駕到口 在西山其曰駕到不知何年事

太液池 戴司成集太液池在西苑中南北互四里東西二百餘步東瞰瑞華島東南有儀天殿殿前老檜一株盤回若偃蓋中架長橋兩端立二坊西曰金鰲東曰玉蟬天氣清明日光混漾清澈可愛燕都遊覽志云太液池在子城西

乾明門外周遭凡數里其源自玉泉山合西北諸水流入都城德勝門匯爲積水潭亦名海子至北安門水關流入西苑人呼西海子耳談云西內海子有斗牛卽虬螭之類遇陰雨作雲霧常蜿蜒道旁及金鰲玉蟬之上世皇齋居西內

宮女過見驚仆官監以聞上曰此宜處山後何爲在此駭人乎是夜聞跋浪跳擲之聲旦視之湖冰破裂一道已徙去矣

劉井 翰林記學士劉定之所浚在公署後堂之左

玉河 燕都遊覽志卽西苑所受玉泉注入西湖逶迤從御溝流而東以注於大通河者隄在東長安門翰林院東畔有坊二署曰玉河東西

隄其南北有三石梁西隄舊有高蔭垂蔭水上而崇禎己巳冬城守官軍禦寒無具盡斫爲薪僅存輪苑牆東一帶矣

泡子河 燕都遊覽志泡子河在崇文門之東城角前有長溪後有廣淀高堞環其東天臺峙其北兩岸多高槐垂柳空水澄鮮林木明秀不獨秋冬之際難爲懷也北有呂公祠以乞夢有驗歲大比諸士子爭往焉河上諸招提苦無廣大者水濱之類園廢圃多置不葺城內自德勝河外惟此二三里間無車塵市囂惜命駕者少耳

金水河 元史金水河源出宛平縣玉泉山流至和義門南水門入京城至大四年七月奉旨引金水河水注之光天殿西花園石山前舊池置厠四以節水

海子 記纂淵海在府西三里汪洋如海中有菱荷鴨鳧可玩湧幢小品禁城中外海子卽古燕市積水潭也源出西山一畝馬眼諸泉繞出堯山後匯爲七里濼紆迴向西南行數十里

稱高梁河將近城分爲二外繞都城開水門內注潭中入爲內海子繞禁城出異方流玉河橋

合外墜入於大通河 燕都遊覽志積水潭在都城西北隅東西二里餘南北半之西山諸

泉從高梁橋流入北水關匯此或因內多植蓮名爲蓮花池或因水陽有淨業寺名爲淨業湖內官監向嚴魚禁今稍弛矣酒後一輩山光水色簫鼓中流時復相遇江以北來無此勝游然